

30/10/1998

Usaha tarik rakyat asing ke Malaysia

Lichong Angkui in Bandar Seri Begawan

BANDAR SERI BEGAWAN, Khamis - Kerajaan akan berusaha menarik seramai mungkin rakyat asing melawat Malaysia untuk melihat sendiri keadaan dalam negara ini yang dilaporkan media asing kononnya berlaku huru-hara di seluruh negara.

Perdana Menteri, Datuk Seri Dr Mahathir Mohamad, berkata langkah itu bertujuan membetulkan laporan negatif media asing yang sengaja memburukkan negara ini.

Beliau berkata, kerajaan tidak bercadang mengenakan kawalan ketat ke atas media asing atau menubuhkan perunding bagi menangani kecaman media asing.

"Apa yang kita perlu buat ialah menarik seberapa banyak orang asing ke Malaysia supaya mereka melihat sendiri keadaan di sini," katanya pada sidang akhbar di Istana Darut Takwa selepas menghadap dan mengadakan pertemuan empat mata dengan Sultan Brunei di Istana Nurul Iman, di sini petang ini.

Dr Mahathir yang dalam rangka lawatan kerja dua hari ke Brunei Darussalam ditanya seorang wartawan tempatan Brunei mengenai keadaan di Malaysia ketika ini berikutan banyak laporan agensi berita asing yang menyatakan Malaysia kini dalam huru-hara.

Perdana Menteri berkata, kerajaan memang sedar banyak laporan media asing seperti CNN, CNBC dan BBC yang memburukkan Malaysia dan sengaja memberi gambaran negatif mengenai Malaysia.

"Kita tak nafi ada demonstrasi, tapi ia terhad di tempat tertentu dan tidak membabitkan seluruh negara. Sudah tentu demonstrasi tidak akan menyebabkan kerajaan jatuh.

"Tapi nampak media asing ini ingin melihat kegawatan politik ditokok kepada kegawatan ekonomi dan kalau boleh mereka ingin melihat kerajaan jatuh. Tapi kerajaan Malaysia adalah dipilih rakyat, cuma rakyat boleh menjatuhkan kerajaan, bukan demonstrasi," katanya.

Perdana Menteri berkata, kerajaan tidak bercadang melantik sebuah perunding khusus untuk menangani isu kecaman media luar itu, memadai dengan menarik seramai mungkin orang luar datang ke Malaysia.

Katanya, ketika persidangan Kesatuan Wartawan Komanwel (CPU) di Kuala Lumpur baru-baru ini, pesertanya mendapati gambaran yang diberikan oleh media asing, khususnya CNN selama ini ternyata meleset.

"Mereka yang percaya kepada berita mereka, tiba-tiba dapati laporan daripada CNN tidak ada asas. Jadi kita kena tarik seberapa banyak orang asing datang ke Malaysia," katanya.

(END)